

No, toż mōmy już grudziyń. Wartko ci tyn łostatni w tym wiyku rocek śleciół. Mieli my i Barbórka i wcoraj Świyntygo Mikołoja. Terozki ino jesce Gody i łód Zilwestra a tak richtik łód Nowygo Roka bydymy już we nowym dwadziestym a piyrszym wiyku.

Tak przy Barbórce spomniół mi sie taki fal. Sztajger pado do jednygo lyniwego grubeloka:

– *Suchejcie ino panie Goik. Vos to kiejsik musiało trefić przy robocie jakiesik pierońskie niyszczynści, prawda?*

– *A po jakiymu, panie sztajger?*

– *Abo zawdy przed robotom mocie w łocach taki pieronowy strach.*

Łód Andrzyjkow to ci mōmy już jadwynt. Ino te co robiom na grubie (w Chorzowie to już niy) to ci majom dispynza i mogom sie jesce w Barbórka fajrować, radować, piwo pić i tańcować. Nale ino łoni. Inksi to już niy i szlus. My to za downego piyrwyj, za bajtli to nojbarzij sie radowali na Świyntego Mikołoja. Grackow ci skuli tego bōło łód dioska. Kiery tam bōł zgobnik abo chachor to ci do pońcochy dostał łoszkrobiny abo hasie. Potym mu Mikołoj drzistnoł ze trzi razy mietłom po dupie, a nieskorzij i tak jakiesik tam maszkyty koźdymu doł. Naćkali my sie szekuladami, konfektami abo bombonami cy co tam fto mioł. I uciechy ci bōła połno rzić. A terozki...? Już żech szkryfloł. Tyn Mikołoj to ino po „supermarkytach” łamzi i to do tego bez cołki grudziyń.

Nale, bōło i tak. Kiejsik łoprowadzoł jedyn berkmōn kamrata Gorola po Chorzowie. Byli i we werku, byli i na grubie a na koniec siedli ci sie u Pyjtra przy piwie. Tym Gorol tak ci sie wierci, myndzi aże wydudkoł:

– *Wiyecie, panie Gogolin. Tu u wos jes fajnie ale u nos jest ło wiela gryfnij.*

– *Po jakiymu – pyto się berkmōn – co Wom sie tu u nos niy zdo.*

– *Ano bo my mōmy take wielgie gory i tela.*

– *Bogać tam gory, tyż mi mecyje. My tyż tu mieli gory ale kozali my je wyrównać bo u nos w Chorzowie musi być ordnung i porzondek. Wiedzom łoni ?*

Wiyncyj inkszym razem a terozki

No, to pyrisk.

Ojgyn z Pniokow